

Innuttaasut ilinniagaqarnermik allagartaqanngitsut inuttut piginnaasaqarfigivilersimasaat nammineerlutillu piginnaanerilersimasaat pisortatigoortumik nalunaarsorneqarnissaat, ataqatigiisillugit aaqqissuuneqarnissaat, suliffeqarfeqarnermilu suliallit illuatungeriit atuinerulernissaat anguniarlugu, Naalakkersuisut sulisoqarnermut tunngasuni attuumassusilinnik suleqatiserinninnissaannik oqaloqatiserinninnissaannillu peqquneqarnissaannik, anguniagaasalu inerneru kingusinnerpaamik UPA18-mi nassuiaammi saqqummiunneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Sara Olsvig, Inuit Ataqtigii)

Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerinnineq

Innuttaasut piginnaasaasa nalunaarsorneqarnerannik suliat nunatsinni Piareersarfiit/Majoriaq aqutigalugu suliat ineriartortinneqartut ukiuni arlalinni ilagisimavaat. Ilitsersuisartut aamma suliffinnut siunnersortit siusinnerusukkut Suliffissarsiuussisarfiusimasuni Piareersarfiusimasunilu innuttaasut piginnaasaat nalunaarsortarsimavaat, tamanna sulianik ingerlatsinermi innuttaasumullu iliussissanut pilersaarummik suliaqarnermi pisariaqaraangat.

2010-mi Naalakkersuisut Kommune Kujalleq suleqatigalugu suliniut aallartippaat, aaqqissuussamik suliffissaaleqisut piginnaaneriniq nalunaarsuilluni katersineq, taamaalioreerneru innuttaasut qanoq ittunik piginnaasaqarnerisut nalunaarsuilluni aaqqissuussisalernissaq siunertaralugu, inuussutissarsiornernut ilinniartinnut suliamut attuumassuteqartunut ingerlatinneqartartussamik, taamaaliornikkut suliffissaaleqisut naleqquttunik pisariaqartunillu piginnaaneqarneranni, aammali piginnaaneriniq tigussaannnginnerusunik peqarnerini pisariaqarfiisigut tunngaviummik ilinniartitsinermik aallartitsisoqartalersinnaaqullugu, immaqalu pissusissamisoorpat tunngaviummik aallarnisaataasumik ilinniagassanik alluilluni aaqqissuussisoqarsinnaaleqqullugu, imaluunniit immikkut aaqqissuussanik ilinniartitsinernik aaqqissuussisoqartarsinnaaqullugu, pineqartut piginnaasaat sammisami naapertuuppata.

Suliniuummi misiligutaasumik aaqqissuussinermik ineriartortitsisoqarpoq, qarasaasiani nalunaarsuiffimmi It-reg-imi pioreersumi, innuttaasut piginnaasaannik katersuiffittut, taamaaliornikkut inuussutissarsiutinut ilinniarfiit pisariitsumik nalilersorsinnaalissammassuk innuttaasooq pineqartoq ilinniakkamik aallartitsinissamut piareersimanersoq.

Sulisut atorfillit 20-it Kommune Kujallermi Suliffissarsiuussisarfinni aamma Piareersarfinni atorfeqartut 2010 immikkut aaqqissuussamik pikkorissarnermik ingerlatsippit, taamaasiornikkut sulisut taakkua pikkorissartinneqartut apersuisarnermik aaqqissuussineq ineriartortinneqarsimasooq aallaavigalugu innuttaasumik oqaloqateqarnermikkut innuttaasup piginnaasaanik qulaajaasinnaalersillugit, taamalu innuttaasup sulinermik inuussutissarsiutilittut ingerlatsereersimaneera siunnerfissaalu sammivik aalajangiussinnaalersillugu, piumassutsimik, nukissanik minnerunngitsumillu ilinniagaqarnissamik upperinnineq piumassuserlu eqeersarneqarsinnaalersillugu.

2016-imi suleqatigiinnermik aallartitsisoqarpoq Ilinniarfitaanermut, Kultureqarnermut Ilisimatusarnermut Ilageeqarnermullu Naalakkersuisoqarfiup aamma Inuussutissarsiornermut, Suliffeqarnermut Niuernermullu Naalakkersuisoqarfiup akornanni, nunatsinni inuussutissarsiutinut ilinniarfinni aaqqissuussamik piginnaasaanik nalunaarsuinermik aamalu piginnaasaanik nalilersuisarnermik ingerlatsisoqalernissaa siunertaralugu, innuttaasut tamatuminnga kissaateqartut pisariaqartitsisullu akornanni ingerlanneqartartussamik.

Taamaasillunilu juni qaammat ukioq manna suleqatigiissitamik pilersitsisoqarpoq Peqqissaanermik Ilinniarfik, Silkeborg-imi Isumaginninnermut Peqqissutsimullu Ilinniarfik (SOSU-skolen) aamma Naalakkersuisoqarfiit pineqartut marluk peqataaffigisaannik. Suleqatigiissitap suliamik ilinniarsimannngitsunut piginnaanngorsarfiusumik ingerlatsisarnissaat piareersarlugit aallartsereerpai. Silkeborg-imi ilinniarfik ukiuni amerlasuuni piginnaasaanik qulaajaasarnermik misilittagaqartuuvoq, innuttaasullu ilinniarsimannngitsut ilinniakkamik ingerlatsinissamik soqutigisaqartut nalilersortarnerannik.

Peqqissaanermik Ilinniarfimmi ingerlatsinikkut misilittakkanik katersisoqareerpat Naalakkersuisut misissussavaat inuussutissarsiornermut ilinniarfiit sorliit ilinniarfitaanerullu sorliit pineqartunut assingusunik ingerlatsiviginissaat naleqquttuussanersoq.

Taamaattumillu Naalakkersuisut imaaliinnarlutik tunngavissaqartinngilaat immikkut nalunaarusiamik suliaqarnissaq, innuttaasut piginnaasarilersimasaasa immikkut nalunaarusiuunnissaat eqqarsaatigalugu, suliasat kommunini Majoriaq aqutugalugu

ingerlanneqareermata, sulianillu aallartitsisoqareermat nunatsinni inuussutissarsiutinut ilinniarfiit akulerunneqarnissaat eqqarsaatigalugu.

Naalakkersuisut matumuuna siunnersuutip itigartinneqarnissaa inassutigaat.